

NEWSLETTER

decembar 2021.



Potpisani ugovori o stipendiraju studenata iz cijele Bosne i Hercegovine

Kraj 2021. godine za Fondaciju Hastor i studente stipendiste predstavlja početak jedne nove priče i novih avantura u koje će se naši vrijedni stipendisti upustiti. U srijedu, 29. 12. 2021. godine u zgradi ASA Prevent grupacije studenti stipendisti su potpisali ugovore o daljem stipendiraju. Pored onih koji su samo produžili svoje ugovore o stipendiraju, pridružili su nam se i novi studenti stipendisti koji su ove godine upisali fakultet. Ukupno 526 studenata stipendista Fondacije Hastor potpisalo je ugovore, a neki time započinju svoju priču kao studenti stipendisti. Iako podijeljeni u grupe, uz poštivanje svih epidemioloških mjera, studenti stipendisti su nakon dugo vremena bili ponovo na okupu.

Uprkos mjesecnim online sastancima koji su na određeni način ipak pružali osjećaj zajedništva, studenti stipendisti nisu krili sreću zbog konačnog okupljanja uživo. Baš kao i na mjesecnim sastancima, studente stipendiste je dočekao uvijek dobro raspoložen direktor Fondacije Hastor Seid Fijuljanin koji je uputio čestitke svim studentima i studenticama na potpisanim ugovorima te ih motivirajućim riječima podsaknuo da nastave nizati svoje uspjehe.

Ako bih morao da u jednoj riječi sublimiram šta je to misija Fondacije Hastor, mislim da bi najprikladnija riječ bila pomaganje, što i jeste naša suština. Svi naši stipendisti od osnovne i srednje škole i na kraju do fakulteta prolaze kroz razne staze koje ih vode do ispunjavanja njihovih ličnih ciljeva i ambicija, a pritom im je stil, način života i rada pomaganje kao jedna od glavnih karakteristika. Studenti stipendisti u misiji Fondacije Hastor su kamen-temeljac, najbitniji stub u njenom funkcionsanju jer su oni ti koji rade s osnovcima i srednjoškolcima i predstavljaju im na neki način uzor koji će slijediti, rekao je direktor Fijuljanin.

Naši studenti su prvenstveno uzori mlađim stipendistima koje, kroz proces mentorstva, potpomažu kako bi i oni vremenom postali baš kao i svoji mentori. Direktor Fijuljanin je dodao da je način na koji studenti stipendisti motiviraju i inspiriraju mlađe stipendiste ključan i da će zahvaljujući tome oni izabrati da im njihovi mentori na neki način budu „role model“. Pored svakodnevnih tema koje studenti stipendisti obraduju sa svojim mentorskim grupama, važno je da učenici steknu izvjesno povjerenje prema svojim mentorima te da znaju da im se bilo kada mogu obratiti i potražiti pomoć od njih. Volontiranje u mentorskim grupama i lokalnim zajednicama predstavlja jednu od osnovnih karakteristika Fondacije Hastor prema kojoj smo prepoznatljivi drugima. Naši stipendisti mjesечно obave više od 20 000 sati volontiranja koji su značajni i za čitavu Bosnu i Hercegovinu.



NOVOSTI



Direktor Seid Fijuljanin najavio je konkurs za prijem novih studenata stipendista koji će postati naša mala vojska pozitivnih promjena i koji će zajedno s ostalim stipendistima biti uzor čitavom regionu.

Studenti stipendisti su se pokazali izuzetno odgovornim kada su u pitanju njihove obaveze prema fakultetskim zadacima, ali i prema Fondaciji Hastor koja ih svakodnevno inspiriše da u svemu što rade budu izuzetno uspješni, a prije svega dobri ljudi koji svojim pozitivnim društvenim djelovanjem mijenjaju zajednice i postaju uzor mladima u Bosni i Hercegovini. O njihovim obavezama prema Fondaciji Hastor studente je uputila bivša stipendistica i članica administrativnog tima Maida Husnić koja je pojasnila osnovna pravila i način funkcionisanja same Fondacije.

Od samog osnivanja 2006. godine Fondacija Hastor svojim radom podržava i osnažuje mlade s ciljem da svaki stipendista nakon okončanja školovanja postane odgovoran, vrijedan i inspirativan građanin ove države koji će svojim društvenim angažmanom biti pokretač promjena, prvenstveno u svojoj lokalnoj zajednici, a nakon toga i u čitavoj Bosni i Hercegovini.

Potpisivanje ugovora sa studentima stipendistima uvijek nas opominje da će upravo ti stipendisti vrlo brzo kročiti u svijet tržišta rada, ali to nas ne rastružuje, naprotiv, sretni smo što će poslodavci vrlo brzo imati priliku da upoznaju ove divne mlade ljude i sigurni smo da će nas učiniti izuzetno ponosnim.

STIPENDISTICA MJESECA

Fondacija Hastor može se pohvaliti marljivim, ambicioznim i uspješnim stipendistima koji ostvaruju zapažene rezultate na polju obrazovanja i nauke. Dakle, tim Fondacije čine mlađi ljudi koji doprinose njenom radu, unapređujući ga svojim znanjem i vještinama. Upravo takve vrijednosti i predanost volonterskom angažmanu u okviru Fondacije Hastor iz mjeseca u mjesec stipendistima donose titulu stipendiste mjeseca. U nastavku čitajte o stipendisti koji je tu titulu odnio ovaj mjesec!

Ajka Čamđić



Stipendistica Ajka Čamđić dolazi iz Briješnice Velike, općina Dobojski-Istok. Po završetku Osnovne škole „Briješnica“ u Briješnici Velikoj i Medicinske škole u Gračanici počinje studirati na Farmaceutskom fakultetu Univerziteta u Sarajevu, gdje je trenutno studentica četvrte godine.

Zašto baš farmacija? Nakon osnovne škole upisala sam medicinsku školu sa željom da jednog dana završim medicinu, međutim, kroz praksu u bolnici nisam pronašla sebe u tom zanimanju. Na prvim vježbama iz predmeta farmakologija počelo je moje interesovanje za lijekove, interakcije lijekova i slično. Svoje slobodno vrijeme provodila sam istražujući o tome. Tako sam otkrila svoj afinitet prema farmaciji, a danas je još veći jer ne učim zato što moram nego zato što želim. Sretna sam što imam priliku studirati ono što volim i gdje ču, nadam se, svoje znanje iskoristiti da pomažem drugim ljudima jer to je uvijek bio moj cilj.

Kroz osnovnoškolsko i srednjoškolsko obrazovanje učestvovala je na takmičenjima iz različitih predmeta (biologije, hemije, matematike, fizike, historije), a kao najveći uspjeh na tom polju izdvaja drugo mjesto na Federalnom takmičenju iz biologije te prva mjesta na Kantonalnom takmičenju iz hemije u trećem i četvrtom razredu srednje škole.

Njeni počeci volontiranja sežu čak do osnovne škole. Ponosi se time što su je nastavnici kroz sekcije učili o empatiji od najranijih godina života. Pored sekcija kroz koje se pripremala za takmičenja, bila je član i ekološke sekcije, što će ostaviti kasnijeg traga na njenim volonterskim aktivnostima.

Učesnica sam mnogih ekoloških akcija koje organizujemo u sklopu Udruženja mladih „Voice“. Nakon velikog broja takvih akcija u našoj općini, pridružili smo se i nekim akcijama van nje, a izdvojila bih akciju čišćenja na Plivskom jezeru. Ekoloških problema je mnogo i smatram da mi mlađi moramo biti pokretači promjena. Trudim se da podignem svijest o prepoznavanju tih problema i pronalasku adekvatnih rješenja. Trenutno je moj aktivistički angažman usmjeren u tom pravcu.

Krajem osnovne škole postaje aktivna članica Crvenog križa Dobojski-Istok. Svoje volontiranje aktivno nastavlja i početkom studija u Sarajevu, gdje je imala priliku da u sklopu Franjevačkog studentskog doma, čija je stipendistica bila godinu dana, svoje volontiranje podigne na viši nivo vođenjem kreativnih radionica, učestvovanjem u organizaciji humanitarnih akcija te pomaganjem administraciji u domu. Također, imala je priliku da volontira i na radiju.

Tokom jedne radionice čula je za Fondaciju Hastor. *O Fondaciji su pričali sve najbolje, pa sam bez mnogo razmišljanja odlučila da apliciram na konkurs za studente. Ono što me najviše privuklo da apliciram za stipendiju jeste činjenica da je Fondacija Hastor jedna od rijetkih organizacija koja cijeni volonterski rad. Tri godine sam stipendistica Fondacije Hastor. Otkad sam pristupila, bilo mi je jasno da je Fondacija porodica gdje se svi uzajamno pomažu i podržavaju.*

STIPENDISTICA MJESECA

Kaže kako je kroz tri godine, otkako je stipendistica naše Fondacije, dobila priliku da unaprijedi sebe i da svojim talentima pomogne drugima. Volontiranje smatra ključnim za sticanje radnih navika jer zahvaljujući njima tranzicija sa studentskog života na radnu svakodnevnicu ne predstavlja prepreku: *Zbog toga se najviše želim zahvaliti Fondaciji, jer me je učinila kompletnijom i zrelijom osobom.*



Volunteerski aktivizam vidi kao temeljni aspekt svog djelovanja. Smatra kako joj pomaže izgraditi vjeru u sebe i u svoju sposobnost da ponudi vlastite odgovore na probleme oko svih nas, odnosno vjeru da može promijeniti svoj i još nečiji svijet. Ipak, pored rada u korist drugih kao volonter, kaže kako je najljepša stvar što time istovremeno radi na sebi, svom ličnom i profesionalnom razvoju kroz izrazito širok spektar mogućnosti koje volontiranje otvara.

Volontiranje je odličan način da upoznam nove ljudе. Ovo je jako važno, posebno ako ste u novoj okolini. Učinilo me prvenstveno odgovornijom i sretnijom osobom. Radim to jer ljudе činim sretnim svojim pomaganjem, a to mene čini sretnijom. Pored svakodnevnih obaveza kod kuće i obaveza za fakultet kao volonter moram pronaći vrijeme za dodatne aktivnosti. To me je motivisalo i da ozbiljnije pristupam organizaciji vlastitog vremena i planiranju svakodnevnih aktivnosti. Pored toga, jedna od najvrednijih stvari je sklapanje novih poznanstava, što u samoj Fondaciji, što kroz mnogobrojne projekte čiji

U Fondaciji tvrdi da postaje sretna onda kada sreću dijeli sa svojim mlađim stipendistima.

Neopisiva je sreća kada mi učenici jave da su dobili dobru ocjenu ili da su primjenili neku vještina koji smo učili na našim sastancima, kada nakon akcije čišćenja vidim čist dio zemlje, rijeke ili jezera ili kada vidim osmijeh osobe kojoj sam na neki način pomoći.

Fondaciju smatra velikom porodicom koja joj pruža pomoć i podršku i koja je ohrabruje da bude što bolja verzija sebe. Pored toga, stekla je nova prijateljstva, iskustva i vještine, a kroz volontiranja je uvidjela značaj istog i načine na koji mladi mijenjaju svijet.

Ono što bih htjela poručiti ostalim stipendistima jeste da prate put humanosti. U ovim teškim vremenima svima nam je potrebna podrška i zajednički problemi nas dodatno zbližavaju. Ne budite neutralni i dozvolite da se vaš glas čuje, a zajedno se čujemo još jače. Stipendistima Fondacije Hastor posebno poručujem da cijene status stipendiste, jer nam Fondacija pruža priliku da pokažemo svoje vještine i kvalitete i iste poboljšamo.



RAM - RUBRIKA AKTIVNIH MLADIH

RAM je, prema definiciji, radna memorija računara. U Bosni i Hercegovini „radna memorija“ su upravo proaktivni i marljivi mladi ljudi koji su svojim djelovanjem primjer društva koje naša država treba. Kroz ovu rubriku predstavit ćemo aktivne i mlade stipendiste Fondacije Hastor koji pored volontiranja rade fenomenalne stvari i tako predstavljaju Fondaciju u najboljem svjetlu!



Merima Osmanović je studentica treće godine Filozofskog fakulteta Univerziteta u Tuzli na Odsjeku za politologiju, usmjerenje – Međunarodni odnosi i diplomacija. Stipendistica je Fondacije Hastor već punih 8 godina. Kroz prethodnih 6 godina Merima obavlja ulogu volonterke i aktivistice te predsjednice Udruženja mladih „Trik“ i koordinatorice „Centra za djecu i mlade“ Kalesija.

Aktivistička priča ove djevojke počinje 2013. godine, kada je prvi put prisustvovala seminaru s međunarodnom organizacijom World Vision BiH, a tema je bila prevencija međuvršnjačkog nasilja. Nakon toga se aktivirala u mnogim organizacijama, ali je nastavila svoje volontiranje u World Visionu i smatra da je zahvaljujući njima postigla sve što sada jeste. S njima je rasla, jačala, pronalazila sebe i spoznala ljubav prema nevladinom sektoru te prema samom World Visionu. Tu su i još neke organizacije koje su doprinijele Meriminom usavršavanju, PRONI Centar za Omladinski razvoj, Omladinski pokret Revolt, Udruženje roditelja djece s posebnim potrebama Kalesija, Let's Do It Tuzla, Crveni križ i mnoge druge. Najupečatljivije u Meriminoj aktivističkoj priči svakako je osnivanje Udruženja mladih „Trik“ na području općine Kalesija, gdje trenutno obavlja ulogu predsjednice.

Tu je pronašla sebe i upoznala mnogo prijatelja. Zahvaljujući „Triku“ naša stipendistica je mnogo putovala i naučila mnoštvo stvari koje joj koriste na fakultetu, ali i u drugim sferama života. Sada dobija priliku da facilitira i vodi treninge gdje je angažuju mnoge organizacije i udruženja te na taj način jača svoje vještine.

Aktivnost na koju sam najponosnija jeste otvaranje Centra za djecu i mlade na području općine Kalesija. Kroz naše djelovanje osjetili smo potrebu za postojanjem ovakvog centra te smo isti otvorili u augustu ove godine uz podršku međunarodne organizacije World Vision BiH i Općine Kalesija. Centar postoji kako bi sva djeca i mladi imali siguran prostor za svoje odrastanje, ali i usavršavanje.



RAM - RUBRIKA AKTIVNIH MLADIH

U sam prostor je uloženo 90.000 KM i opremljen je po svjetskim standardima. Merima je mnogo radila na opremanju Centra, gdje je od februara provodila skoro svaki dan radeći na pripremama za otvaranje. To je nešto na šta je najponosnija i što uvijek voli istaći. U cijelom ovom procesu naša stipendistica je koordinirala svim aktivnostima i komunicirala s dobavljačima, majstorima i donatorima. Ponasna je i presretna što je upravo ona dobila tu priliku jer je zahvaljujući svom dosadašnjem angažmanu pokazala i dokazala da može iznijeti taj cijeli proces. Ono što je od posebnog značaja jeste činjenica da je Merima pokazala da ima veliku želju za ostvarivanjem velikih stvari poput ove.



Smatram da je itekako važno da budemo aktivni u svojim zajednicama i da im doprinosimo, ali, prije svega, po meni je najznačajnije to što mi kroz svoj aktivizam učimo o sebi, spoznajemo sebe, jačamo svoje kapacitete i vještine. Sve to će nam služiti za budućnost, a ja mogu s pravom reći i iz vlastitog iskustva dokazati da se vještine javnog govora i izgradnja samopouzdanja kasnije itekako isplate i budu prepoznate i cijenjene.



Fondacija je u Meriminoj priči oduvijek tu kao podrška i motivacija da bude bolja i odgovornija u svemu što radi. Kroz volonterski i aktivistički angažman svoje vještine je prenosila na druge stipendiste i njima govorila o istima, a Fondacija je konstantno cijenila njen rad.

Njena poruka za stipendiste Fondacije Hastor jeste da uvijek budu svoji i da nikada ne odustaju od svojih ciljeva i želja i onog što oni smatraju ispravnim. Bez obzira na sve poteškoće nikada ne trebaju odustati. Najbitnije je da vjeruju u ono što rade i što žele. Svoje riječi je dokazala djelima o kojima govori s ponosom, a Fondacija je tu da podrži studente koji imaju šta reći i djelima pokazati svijetu.

Dekartov kvadrat

Sigurno ste do sada u mnoštvu teških odluka i neugodnih situacija pomislili kako bi bilo dobro da imate neki štapić kao u crtanim filmovima, pa da se taj problem rješi, no da li ste ikad pomislili da nas ti problemi ili neugodne situacije čine jačima i osnažuju naš karakter? Postoji izreka koja kaže da te ojačalo ono što te nije ubilo koja je i djelimično tačna. Francuski filozof i matematičar Rene Dekart je osmislio taj „čarobni štapić“ uz pomoć kojeg možemo vladati svojim problemima, situacijama i, najvažnije, možemo izaći kao pobjednici. Taj postupak koji je osmislio zove se Dekartov kvadrat. Ideja o ovom kvadratu je da se iskreno odgovori na četiri pitanja:

Šta će biti
ako se to
dogodi?

Šta će biti
ako se to
ne dogodi?

Šta se neće
desiti ako se
dogodi?

Šta se neće
desiti ako se to
ne dogodi?

Ova četiri pitanja nam omogućavaju da problem sagledamo iz četiri različita ugla te da ga ne uvećavamo, kako smo tome često skloni. Također, odgovaranjem na ova četiri pitanja pravimo balans u našem umu i time možemo jasnije i bolje vidjeti prirodu problema. Budući da su pitanja slična, ovdje treba biti obazriv kod duple negacije u pitanju Šta se neće desiti ako se to ne dogodi, jer će naš mozak pokušati da izbjegne duplu negaciju i onda bi odgovor mogao sličiti odgovoru na prvo pitanje.

Da biste to izbjegli, uzmite komad papira i olovku i zapišite pitanja ili to uradite na svom mobilnom telefonu, koristeći aplikacije predviđene za to. Najbolji način je da nacrtate kvadrat (zato se i zove Dekartov kvadrat) i da tako odgovorite na pitanja. U gornja dvaугла napišite pozitivna pitanja, a u donja dva negativna. Na ovaj način vrši se analiza kojom ističemo glavne prednosti i nedostatke problema. Ako na ovaj način analiziramo, moći ćemo lakše vršiti izbor i predvidjeti rizike. Uz to, vidjet ćemo i trebamo li nešto činiti ili ne i vidjet ćemo moguće ishode.


Ova metoda je efektivna jer nam pomaže da racionalno reagujemo i da odgovaranjem na pitanja rješimo problem ili donesemo tešku odluku.

Ukoliko niste koristili ovu metodu, toplo je preporučujemo. Ne samo da ćete donositi teške odluke nego ćete naučiti i analizirati stvari i mogućnosti iz više uglova. Time ćete biti manje razočarani i lakše ćete odrediti svoje ciljeve i otkloniti prepreke na putu ka njima. Ovo je i jedan vid razgovora sa samim sobom, pa ćete možda i upoznati novu sferu svoje ličnosti.

BUDIMO KONKURENTNI(JI)!

U 21. stoljeću nije dovoljno imati odličan uspjeh u obrazovnom procesu da bi se osoba učinila atraktivnom na međunarodnom nivou, nivou studija ili zaposlenja. Nerijetko se može vidjeti i čuti da su mladi ljudi koji su skoro diplomirali ili magistrirali nezaposleni, a da su pritom slali svoje biografije (Curriculum Vitae) na nekoliko objavljenih konkursa. Sve manje mladih zna da pravilno koristi online resurse kojima raspolažu (npr. pravilno korištenje e-maila). Ova rubrika ima za cilj edukacije, seminare, programe razmjena, ali i pokazati na koji to način studenti na međunarodnom nivou rade na vlastitom unapređenju.

Kada poslodavci gledaju CV nekog diplomanta, fokusirani su na pronalaženje dokaza o vještinama rješavanja problema te sposobnosti za timski rad. NACE Job Outlook 2020 istraživanje je koje pokazuje da su, pored prosjeka ocjena, upravo spomenute vještine najvažnije za poslodavce. Više od 91% ispitanika poslodavaca u kandidatima koje zapošljavaju traži poznavanje vještina za rješavanje problema, a više od 86% želi dokaz o vještinama za učešće u timskom radu. Ovo istraživanje sastoji se od liste 20 najpoželjnijih vještina, a za kraj ove godine donosimo i finalnih 5 vještina, rangiranih od 16. do 20. mesta, kao i savjete kako iste izgraditi i/ili unaprijediti.




Počnite uspostavljati kontakt s ljudima oko sebe na početku malim koracima, bilo da su to stranci, poznanici, kolege ili prijatelji. Kontakt očima i mali prijateljski pokreti mogu mnogo pomoći. Kažu da je osmijeh zarazan, dakle, ako vas neko gleda direktno dok kupujete u prodavnici, nasmijte mu se i vidjet ćete da većina ljudi reaguje pozitivno i da će vjerovatno i uzvratiti osmijehom, što će vam u startu jačati samopouzdanje. Nakon što savladate osmijeh, predite na pozdrav, pa onda i pitajte nekoga za savjet ili jednostavno udjelite kompliment. Što se više naviknete na uspostavljanje komunikacije sa strancima i poznanicima, to će vaša otvorenost postajati prirodnija kako vama samima tako i ljudima oko vas. Na kraju dana niko se neće sjećati koliko ste nervozno zvučali prvih nekoliko puta kada ste sreli te osobe nego će vas pamtitи kao osobu koja se potrudila da napravi prvi korak, koja se nije plašila da postavi pitanje u grupi i koja je imala nešto lijepo da kaže na kraju razgovora, put: „Bilo je sjajno razgovarati s tobom, trebamo ovo

Uspješni ljudi spremni su na rizike kako bi premostili prepreke. Rizici vas mogu izložiti određenom stepenu fizičke, finansijske ili emocionalne opasnosti, ali su nekada neophodni da biste iskoristili nove prilike. Poduzimanje proračunatih rizika popraćeno je povećanim samopouzdanjem (emocionalno rizične aktivnosti, poput javnog nastupa, mogu dovesti do pozitivnih ishoda gdje steknete novo povjerenje u vlastite sposobnosti), usvajanjem novih vještina (izlaskom van svoje zone komfora u sportu, umjetnosti ili akademiji možete poboljšati svoje sposobnosti, što također dovodi do povećanja samopouzdanja) te finansijskim nagradama (ulaganje zahtijeva proračunati rizik, a potraga za novim poslom ili boljom ravnotežom između posla i privatnog života također uključuje određen nivo rizika za većinu ljudi). Neki rizici se možda neće isplatiti, ali optimistična osoba spremna rizikovati će uvijek na neuspjeh gledati kao na priliku za učenje. Spremnost da se eksperimentiše s novim idejama ključna je za poslovni rast.




BUDIMO KONKURENTNI(JI)!



Biti taktičan znači iznijeti istinito i iskreno mišljenje drugoj osobi bez povređivanja njenih emocija i osjećaja. To je način da se očuva i održi odnos bez vrijedanja osobe. Češće su iskreni ljudi skloni povrijediti tude emocije zbog grubog priopćavanja istine. Umijeće takta i diplomatije podučava osobu održavanju i očuvanju odnosa bez stvaranja pukotina u vezi. Pruža prostor za davanje povratnih informacija bez gajenja pritužbi i nesporazuma u odnosima. Pričljiva osoba gubi kontrolu nad odabirom riječi u komunikaciji. Da biste naučili umijeće taktičnosti, uvijek treba ostati konkretni u smislu traženja objašnjenja. Ispitivanje vašeg poнашања kako biste prevladali nedostatke bit će od velike pomoći u učenju umijeća taktičnosti i diplomatije. U ovim situacijama važno je više slušati nego pričati, a taktičnost će vam sigurno mnogo pomoći u prvom radnom okruženju kada se suočite s njegovim izazovima.

Mnogi poslodavci cijene kreativnost. Bez obzira na to u kojoj branši radite ili planirate raditi, otkrit ćete da vam kreativnost može pomoći u svakodnevnim zadacima i dugoročnim ciljevima. Učenje kako primijeniti kreativno razmišljanje na svoje poslovne obaveze može vam pomoći da razvijete nova i učinkovita rješenja za uobičajene izazove s kojima se susrećete u svojoj radnoj ulozi. Možete početi kreativno razmišljati u svojoj karijeri koristeći sljedeće savjete:

1. Objedinite informacije koje već imate.
2. Razmotrite očito rješenje ili proces.
3. Razmislite o dodatnim rješenjima.
4. Razmislite kako su teme povezane.
5. Primijenite rješenja.



Iako je samo 2,9% poslodavaca istaknulo poznavanje stranog jezika kao važnu vještina za studente, važno je napomenuti da je ovo istraživanje sprovedeno na tržištu gdje je engleski jezik zvanični. Ova vještina je za studente iz Bosne i Hercegovine ipak mnogo značajnija, stoga vas ohrađujemo da unapređujete vaše znanje stranih jezika ili čak učite neki novi. Ranije smo pisali o različitim platformama koje možete koristiti za učenje, a sasvim je sigurno da će poznavanje bilo kojeg stranog jezika i njegovo prisustvo u CV-u napraviti upravo vas konkurentnijim u odnosu na neke druge kandidate koji ne poznaju niti jedan strani jezik.

OBJEKTIV



Adisa Bajramović



Emina Nukić



Harun Hadžo



Asja Hadžić



Džejna Čizmo



Alma Ćosić



Ajla Imamović

POETSKI KUTAK

Domovina – lijek

Ako si imala tmuran dan
Ili su ti niz obraze tekle neke tople kiše
Sjeti se da si pod svojim krovom
I da nisi sama, uvijek s tobom neko diše.

Sutra kad budeš prelazila Stari most
Zastani, udahni malo have koja te odgojila
I spusti pogled ka Neretvi
Neka ona preuzme sve što na leđima si nosila.

Ti, koja svaki dan travničkim ulicama prolaziš
Na ovaj dan se divi obroncima Vlašića
I zagrli stari grad očima
Vjeruj, tu je lijek tvojim neprospavanim noćima.

Iako ga gledaš otkad i na ovom svijetu bivaš
Bihać je i dalje kolijevka ljepote življenja
Oči tamne umij u valovima Une
I vidjećeš, pod tim kapcima se ljepše sanja.

A Saraćima ko svaki dan prolazi
Njemu blago, njega život voli
Sve bih dala da sad osjetim promrzle ruke Sarajeva
I da Baščaršija zagrli sve moje boli.

Nedžma Latić



Kontaktirajte nas!

Bulevar Meše Selimovića 16.
Sarajevo
033 774 789
033 774 823
fondacija@hastor.ba



Redakcija

Maida Husnić
Una Karabeg
Nejla Komar
Emra Kulo
Fatima Gazić
Aleksandra Đukić
Alek Isaković
Almina Šabanović
Nedžma Latić



Grafički dizajn

Ada Sivac
Edna Porča



Naslovница

Ada Sivac,
"Pustinja", ulje na platnu